

RADUNANZA CUMÜNELA

93. Protocol dals 27-11-2019 - 20.15 h

Il president cumünel, sar Andrea Gilli, po salüder 40 personas cun dret da vuscher, v.d. 5.9% dal total da las votantas e dals votants, a la radunanza cumünela illa Seletta da la chesa da scoula a Zuoz.

El salüda specielmaing a sar Patrick Steger scu nouv chanzlist cumünel, chi cumpiglia sieu prüm protocol ed a sar Beat Schärer, il contabel da la vschinauncha, chi sto a disposiziun in cas da dumandas in connex cul preventiv 2020. Las medias nu sun rapreschantedas.

Scu scrutinaduors vegnan numnos e tschernieus per la vart schneistra vers Arpiglia sar Guido Camichel e sar Roman Grossrieder per la vart dretta vers Albanas e la maisa dal cussagl.

Aunz scu cumanzer cun las tractandas as permetta il president cumünel da fer ün pèr remarchas preliminaras. In ögl do il nouv plazzamaint da la cusgliera e'ls cusgliers düraunt la radunanza cumünela. Els tschaintan uossa davaunt vart da la vart vers Albanas uschè cha vezzan eir sülla taila per seguir a la preschantaziun. Impü es eir l'apparentscha da la preschantaziun da power-point nouva. Il nouv chanzlist ho adatto la preschantaziun sün ün parair pü modern. La radunanza vain bainvgnida cun ün purtret da Zuoz dal 1896, ün documaint da granda valur chatto aint il archiv.

La bannida e la missiva sun gnidas tramissas als votants e las votantas da Zuoz infra temp ütil tenor artichel 30 da la costituziun. Las tractandas vegnan acceptedas unanimamaing scu propostas.

549 01 Organisaziun da vschinauncha
 01.C Radunanza cumünela
 01.D.01 Approvaziun protocol

1. Protocol da la radunanza cumünela dals 21 avuost 2019

In sieus plets d'introducziun per quista tractanda declera il president cumünel cha dal protocol da la radunanza cumünela dals 21 avuost 2019 ho pudieu gnir piglio invista sülla pagina d'internet da la vschinauncha ed in chanzlia cumünela dals 27 avuost fin als 27 settember 2019. Il ravuogl da la radunanza cumünela nu pretenda cha'l protocol ho da gnir prelet. Sainza remarchas ed objecziuns accepta la radunanza il protocol dals 21 avuost 2019. Il president ingrazcha al anteriur chanzlist per la cumpilaziun.

550 03 Finanzas
 03.H Büdschet

2. Preventiv per l'an 2020

Il president fo üna cuorta introducziun a quista tractanda. El spiega cha'l cussagl cumünel ho surlavuro il preventiv 2020 trais voutas, que da maniera conservativa. Il president remarcha il focus tal provedimaint d'ova da surlavurer l'infrastructura i'ls prossems ans.

Priorited ho il reservuar Truoch. Il listess mumaint drouva que ün concept cumplessiv per avoir üna survista sur da tuot la situaziun. Quist concept do alura la basa per decider ils prossems pass.

Il president surdo il pled a sar cusglier Lucian Schucan scu depüto da las finanzas. A maun d'üna preschantaziun cul power-point repassa il depüto il preventiv per l'an 2020, la valutaziun finanziela e'l preventiv d'investiziuns per l'an 2020. El declera ch'üna fich granda part dals cuosts es chaschuneda tres terz e cha la vschinauncha nun ho niauncha pü üna grand'influenza süllas cifras. In basa da tabellas muossa'l inua cha que do, in conguel cul büdschet per l'an 2019, müdamaints pü grands. Ils cuosts e las entredgias progettedas dal preventiv as baseschan sü'l preventiv 2019 e süls resultats da l'an curraint. Ils müdamaints pü grands sun declaros in detagl illa missiva. Zieva tuot quists adattamaints serra il preventiv 2020 cun ün **avaunz da frs. 34'314.00**.

Il preventiv d'investiziuns 2020 prevezza investiziuns totelas da frs. 4'317'300.00 ed entredgias da frs. 1'085'000.00. Quist do ün surpü da frs. 3'232'300.00.

Arduond ün terz da quist import chaschunan ils cuosts vi da la ARO EO. Tals stabels dal cumün es previs la planisaziun per l'adöver futur da la Tuor. Impü üna nouva garascha per la maschina da loipas chi'd es granda avuonda. Per la planisaziun d'üna nouva zona d'inscunter i'l minz da la vschinauncha e Plaz es previs ün import da frs. 50'000.00. La Via Curtinellas vain saneda dal 2020 e per la planisaziun dal mür illa Via Survih e per l'areal Resgia sun previs imports da frs. 50'000.00. La realisaziun da la piazza da muvimaint Resgia vain realiseda dal 2020 cun ün import da frs. 40'000.00. Siand cha'l vegl trax cun pneus do sü il spiert es previs ün import da frs. 100'000.00. Per la rumida da naiv propuona il cussagl da cumprer ün nouv schlavazzun per metter la naiv dalum da la via aint in camiuns per transporter davent, quist cun ün import da frs. 50'000.00. Il reservuar da Truoch es da saner dal 2020. OTRAS sanaziuns da reservuars vegnan decisas da cas a cas. Impü es previs ün stüdi per ün concept cumplessiv provedimaint d'ova a Zuoz. Sün Albanas vain realiseda la quart'etappa dal proget repars chi vain inavaunt subvenziuneda cun 70% dal Chantun. Tar las alps vain realiseda la seguonda part da la Via Arpiglia ed eir la Via Vaüglia stu gnir saneda. Sü'l champ dal turissem sun planisedas grandas investiziuns: Il program d'acziun 2025 scu import pü grand es la via strategica chi definescha l'agir i'ls prossems ans. Ün nouv sistem d'infurmaziun electronic (Tweebie) vain installo in Resgia, a la Staziun ed i'l minz dal cumün. Inavaunt dess eir gnir realiseda l'installaziun d'innaivamaint sün Albanas (Traversa, pista cotschna).

Il president ingrazcha al depüto per las spiegaziuns detagliedas ed evra la discussiun.

Siand cha que nu do dumandas po il president suottametter il preventiv 2020 a la votaziun. La radunanza accepta tel unanimamaing e sainza cuntravuschs.

551 04

Impostas

3. Pè d'impostas cumünelas per l'an 2020

Il president infurmescha cha zieva cha la radunanza cumünela vaiva decis dal 2018 da sbasser il pè d'impostas dad 85% sün 75% fo il cussagl cumünel la proposta da relascher il pè d'impostas sün 75% da las impostas ordinarias Chantunelas per l'an 2020. La radunanza cumünela aderescha a la proposta sainza cuntravuschs.

552 01 Organisaziun da vschinauncha
01.D Cussagl cumünel

4. Preschantaziun e decisiun strategia Zuoz 2025

Il president preschainta il program d'acziun Zuoz 2025 a maun d'üna preschantaziun cun power-point. El orientescha sur dal las differentas etappas daspö la prüma preschantaziun illa radunanza cumünela dals 21 avuost 2019. Zieva quella ho gieu lö la publicaziun inua cha la populaziun ho gieu la pussibilted da's parteciper a la discussiun ed inoltrer reacziuns. La resonanza d'eira enorm positiva, dad indigens ma eir davart possessuors dad abitaziuns secundarias. In fuond es il program d'acziun illa dimensiun da Zuoz 2025 ün pass curaschus dal cussagl cumünel e da l'administraziun cumünela chi chaschuna granda respunsabilited e lavur. Important es cha la strategia nu dvainta ün tigher da palperi, ma cha'l dossier vain elavuro dinamicamaing e surlavuro regularmaing. Minch'an a la fin da l'an dess gnir preschanto a la radunanza cumünela ün barometer sur da progets accumulieus, progets in elavuraziun e progets planisos per l'an chi segua. Impü dess adüna rester aviarta la discussiun per adatter il program cun novs progets o dad eliminar progets planisos, scha quels nu sun pü actuels o nu faun pü sen.

Il president spiega il program d'acziun chi'd es documento detagliedamaing in ün cudesch separo e disponibel sülla pagina d'internet da la vschinauncha da Zuoz e sün chanzlia. Las acziuns planisedas per l'an 2020 vegnan preschantedas explizit. A la prosma radunanza cumünela dals 12 favrer 2020 vain preschanteda la glista detaglieda cullas imsüras per l'an 2020 cun imports concrets ed ün raz da temp chi demuossa cura cha che imsüra vain elavureda ed implementeda.

Zieva cha'l president ho declaro tuot ils princips strategics, ils champs d'acziun e l'organisaziun da la realisaziun evra'l la discussiun.

Duos votantas remarchan ch'Ellas hegian inoltro il giavüschi da piglier sü la tematica da l'energia e sun surpraisas da na avoir clappo üna resposta. Il president respuonda cha la resposta e l'ingrazchamaint sün tuot las reacziuns inoltradas da la populaziun seguan a la decisiun da la radunanza cumünela dad hoz, ils 27 november 2019. Üna da las votantas do impü il tschegn cha hozindi füss que ün dovair dad aspirer per il label da «cited d'energia». Il label «cited d'energia» es ün attest da prestaziun per vschinaunchas chi demuossan e vivan üna politica cumünela da dürabilited. Il president declera cha la tematica energia vain piglieda sü per l'an 2021.

553 01 Organisaziun da vschinauncha
01.C Radunanza cumünela
01.C.05 Infurmaziuns

Orientaziuns

Analisa da periclitaziun: Düraunt ils ultims mais ho üna gruppa da lavur cun sustegn dad experts elavuro quist'analisa dumandada dal Chantun Grischun. L'analisa vo a fuond a tuot las periclitaziuns chi do per la vschinauncha da Zuoz. Quist proget chatta sia culminaziun in ün exercizi cun tuot la direcziun da stab da sted 2020.

Scoula da Musica Engiadin'Ota: La Scoula da Musica Engiadin'Ota cumbatta cun problems finanziaels ed ho perque do desditta al contrat culla Regiun Malögia. Quist per tratter e discuter üna nouva fuorma da finanziaziun.

Collavuraziun scoula regiunela: Sü'l champ dal s-chelin ot sun intuorn discussiuns sur da collavuraziun illa regiun. Ils presidents da La Plaiv haun comunicho cha Zuoz es ün ferm lö da furmaziun e cha's voul mantegner que. Tantüna as resta aviert per discussiuns in tuot las direcziuns.

Rumida da naiv: Zieva la prüma granda naiv es il facit sur da la rumida da naiv ourdvard positiv. La problematica cha grandas massas da naiv portan sun però visiblas ed il nouv sistem chi saro pussibel cullas maschinas chi sun aint il preventiv 2020 saro ün pass inav-aunt.

Infurmaziun saglianter lavinas: L'infurmaziun sur dal saglianter lavinas capita illa listessa fuorma scu i'ls ultims ans. Impü as po nouv eir s'infurmer sülla pagina d'internet da la vschinauncha da Zuoz, scha vain saglianto e cura cha las vias sun serredas.

Avertüra Volg: Zieva bod quatter eivnas sto il Volg darcho a disposiziun in ün nouv vstieu. Il Volg es üna spüerta importanta i'l minz da la vschinauncha ed ad es important dad eir fer adöver da quista.

Promulins: As es landervi dad elavurer las offertas entredas per l'accumpagnamaint da fabrica zieva cha que ho do ün poïn retard cun scriver oura las lavuors.

554 01 Organisaziun da vschinauncha
 01.C Radunanza cumünela
 01.D.02 Varia
6 Varia

Ün votant fo la dumanda scha que pudess fer sen dad introdür darcho la cumischiun da god per eviter ün cas scu quel chi vain güst examino a S-chanf. Il president respuonda cha la dumanda vain piglieda sü.

Zieva cha nu vain pü dumando il pled ingrazcha il president cumünel a las votantas ed als votants per la cumparsa e serra la radunanza a las 21:15 in giavüschand a tuots üna bella saira, ün bel temp d'advent ed ün bel inviern cun bgera naiv.

In buna fè

Il president cumünel

Il chanzlist cumünel